



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Onoki takok tashi toktepogo; Priyanka Gandhi

Pak opposition-i PM Khan mapa nungi anentsü akhanger



VOL. XIX NO. 145 (ADOK 145) DIMAPUR RASEMNÜ (WEDNESDAY) METSÜREMI (MARCH) 09, 2022

₹ 5.00

COVID-19 Nagaland: 4 dak putet, 4 taneptsü angu

Kohima, March 8, 2022 (TYO): Nagaland nung Mongulbarnü nisung 4 dak COVID-19 putet aser 4 taneptsü angu.

Tanü Dimapur nung nisung 3 aser Longleng nung nisung ka dak COVID-19 putet. Külen taneptsü angurtemji Dimapur nungi lir.

Nisung 35,434 rongnungi 33,133 taneptsü nguogo aser ibaji taneptsü angur 93.50% lir.

Nagaland nung tang nisung 62 anepaludar saka parnok 56 dakbo shirangba yimya kecha mali.

March 6 tashi nung arishi küm 15-18 tsüngda tainyinlong 86,695 nem COVID-19 vaccine agütsüogo.

Kasa mapang arishi küm 18 ser temapur 8,16,671 nem COVID-19 vaccine indang dose 14,73,460 agütsüogo.

Vaccine agirtem rongnungi nisung 6,33,654-i dose anaprong agiogo. Parnokji frontline workers 48,920, healthcare workers 13,606, arishi küm 45 ser temapur 1,88,869 aser arishi küm 18 nungi 44 tsüngda alir 3,82,259 lir.

Külen, nisung 23,135 nem precautionary dose agütsüogo. Parnokji health care workers 3,431, frontline workers 17,618 aser arishi küm 60 ser temapur 2,086 lir.

Mar 31 nü Rajya Sabha elections agütsü

New Delhi, March 8, 2022 (Agencies): March 31, 2022 nü Rajya Sabha menden 13 atema election agütsü ta Election Commission-i metetdaksüogo.

Rajya Sabha menden 13 ya state 6 nung lir. Punjab nung pungu, Kerala nung asem, Assam nung ana aser Himachal Pradesh, Tripura o Nagaland nung kaka lir.

Kümsük agi atongertemji Assam nungi Ranee Narah o Ripun Bora, Himachal Pradesh nungi Anand Sharma, Kerala nungi A. K. Antony, M. V. Shreyams Kumar o Somaprasad K, Nagaland nungi K. G. Kenye, Tripura nungi Jharna Das (Baidya) aser Punjab nungi Sukhdev Singh, Partap Singh Bajwa, Shwait Malik, Naresh Gujral o Shamsher Singh Dullo nung lir.

State pungu nung Rajya Sabha elections agiba ajanga Presidential election nung kongshitsü aser ano Rajya Sabha nunga temelenshitem

bener arutsü.

State pungu nungi pezü nung BJP sorkar liasü aser Uttar Pradesh o Uttarakhand nungbo parnok nübo teimba liasü. Punjab nung Congress sorkar liasü.

Election agiba state tem nung BJP menden ajemra Presidential election nung parnok tashimait akümtsü.

Lok Sabha aser Rajya Sabha nungi MP 776 aser state o Union Territory tem nungi MLA 4120 ajanga India President shimer. *Issue of Notifications: 14th March, 2022*

Last date of making nominations: 21st March, 2022

Scrutiny of nominations: 22nd March, 2022

Last date for withdrawal of candidatures: 24th March, 2022

Date of Poll: 31st March, 2022

Hours of Poll: 09:00 am- 04:00 pm

Counting of Votes: 31st March, 2022 at 05:00 pm

Congress-i Manipur nung observers 3 mapa lezmüksür

Guwahati, March 8, 2022 (Agencies): Congress-i Manipur nung election agiba sülen tensa reprangshima atatsü atema observers yokogo.

Manipur nung sorkar akümtsüsa telok kati dang takok mangutsü akok ta jembiba ajanga observers yoker.

2017 Manipur assembly election nung Congress-i menden teimba nung takok ngu liasü saka parnoki sorkar mekümte.

Chhattisgarh Minister TS Singhdeo, Vincent Pala aser Mukul Wasnik nung Manipur nung observers ama mapa lezmüksüogo.

Congress MLA temi takok anguba sülen observers-i parnok nüka atatsü aser central lennirtem den osang agiteptsü.

Congress MLA tem tanga party nung medendaksü külemi ayutsü atema iba mapa ya inyaker. Külen, Karnataka Congress

president DK Shivakumar-i Goa nung observer ama inyaksü.

BJP-i menden 40 tema nung takok angutsü.

Manipur BJP president Adhikarimayum Sharda Devi-ibo lar party ajanga menden 40 tema nung takok angutsü ta shiogo.

March 10 nü election results sangdongba sülen BJP-i Manipur nung sorkar akümtsü, ta Sharda Devi-i ashi.

"Onoki menden 40 tema nung takok angutsü alizüng ayu aser ibaji ataloktsü" ta lai ashi.

N Biren Singh-i maneni Chief Minister inyaksü. Onoki CM atema telemteba kecha magi kechiyong paisa inyaksü, ta Sharda Devi-isa metetdaksü.

Yashi exit polls results ajanga Manipur nung BJP-i takok tulu angutsü ta bushitetba osang sangdongba sülen Manipur BJP president-i tanü iba osang metetdaksüogo.

Naga tsür 4 nem MykiFest Award 2021-2022 agütsü



Sesino Yhoshü-i MykiFest Award 2021-2022 agizükba angur.

Dimapur, March 8, 2022 (TYO): March 8, 2022 International Women's Day indang sentong ka agidang tetsür pezü nem MykiFest Award 2021-2022 agütsüogo.

Parnok ya Sesino Yhoshü, Zakilhounuo Tepa, Abi Humtsoe aser Sibeule Zeliang nung lir aser sempet angur shia Rs. 40,000 senpet den kulikaket den sempettem agütsü.

Sesino Yhoshü ya TakeOne, Kohima kibur lir. TakeOne ya 2014 küm lapok aser iba ya audio-visual production house ka lir. 65th National Film Awards nung lai yangluba "The Pangti Story" ajanga Best Environmental Film (non-feature) takok angu. 7th National Science Film Festival 2017 nunga kasa film ajanga Golden Beaver Award ngu liasü.

Sesino Yhoshü-i Young Achievers Award agizükogo. Laisa Northeast Film Festival 2015 nung "Story of a House" atema Best Director (Short Film) sempet ngu liasü.

Zakilhounuo Tepa ya Taxi Driver ka lir aser la ya Kohima district kübok Mima yimtsür lir. La arishi küm 31 tain asüdag gari anitsü angazük aser 2014 nungi la indang taxi anishitsü tenzüka liasü. Lai BOC Kohima aser Jakhama tsüngda taxi anishir.

Abi Humtsoe ya M/S Naga Traditional Corner, Wokha indang kibur lir. La ya entrepreneur ka lir aser küm 15 tema sobaliba sobusolemtsü dak sendakba maparen inyaker. Lai talisa Lotha-Naga indang sobusolemtsü nung temolung

agütsür aser tetsür yartsüngsanger telok kar den külemi inyaker.

Arishi küm 81 tain Sibeule Zeliang ya 1987 küm mezüng election nung toktepbba tetsür ka lir. 7 Peren AC nung lai Independent Candidate ka ama toktepbba saka tamakok nguaka lai maneni social worker ka ama inyaka aru aser tetsür aika yariogo. Sibeule-i tetsür 100 tema nem mapa agütsüogo. Sibeule-i tang 6 Ward Mdupiram Chairperson aser 9 Ward Chairman, Union President, Peren town inyaker.

Iba sentong nung tetushi süa jaoker Commissioner & Secretary, Women Resource Development and Horticulture, Anenla T Sato-i o jembidang "loktiliba tejakleni aotsü atema nisung ajak tebilemtsü khuret kasasa lir aser tetsürtemi maneni kibong, loktiliba aser linük akangshitsü atema inyaksü ayongzük" ta ashi.

MykiFest-cum-International Women's Day benjungmong nung shilem ka ama Department of Women Resource Development ajanga Prepared Speech aser Acrylic Painting tetoktepbatem ayongzükaga.

Thuisemla Shanglai-i acrylic painting aser Lihzu Shiney Konyak-i prepared speech tetoktepbatem nung mezüngbuba jenjang takok angu.

Küm ana sülen Mar 27 nungi 'international flights' tenzüksü

New Delhi, March 8, 2022 (Agencies): India nung küm ana tashi coronavirus wara ajanga international flights noktanga aruba March 27 nungi lapoktsü ta Ministry of Civil Aviation (MoCA)-i Mongulbarnü metetdaksü.

"Alima nung vaccine agiba reprangdangba aser sendaktepa alirtem den asüdagangyaba sülen India sorkari March 27, 2022 nungi international passenger services tenzüksü telemteba agiogo" ta parnoki ashi.

March 23, 2020 nungi India nung Covid-19 wara ajanga international flight services anena liasü saka air bubble maparen kübok India aser linük 37 tsüngda special international flights senzüa arur.

"Linük ana tsüngda telatetba kar yua tayimtsü senzüba Air Bubble maparen anener" ta Civil Aviation minister Jyotiraditya Scindia-i ashi.

Mongulbarnü nisung 3,993 dak COVID-19 putet aser iba ya

anogo 662 nung nisung tajemtiba dak putetba lir, ta Union Health Ministry-i metetdaksü.

Health & Family Welfare ajanga international travel guidelines agütsüba ama inyaksü ta Aviation Ministry-isa metetdaksü.

COVID-19 menatepbba noktangsü atema Directorate General of Civil Aviation or (DGCA)-i March 2020 nungi international flight services anentsü telemteba agia liasü.

Advisor Tovihoto-i Dimapur colony councils nem megaphones agütsü

Dimapur, March 8, 2022 (TYO): March 8, 2022 nü Power Advisor, H. Tovihoto Ayemi-i Dimapur Municipality kübok colony council tem nem megaphones lema agütsü.

Iba atema Dimapur Urban Council Chairmen Federation (DUCCF)-i Niu Colony, Burma Camp Dimapur indang council hall nung sentong ka ayonga agi.

"DUCCF-i anir urban councils ajanga Dimapur tejakleni anir aoba atema tenüngsang agütsür" ta Advisor Tovihoto-i ashi.

"Colony lennirtemi tebilemtsü khuret aika abener aser public-ia aika imlar. Lenisüba nung mapa inyakba dena lir aser nisung kati leniba mapang nübortem yaritsü indang alizüng tajung ayutsüla. Colony ka renlokba aser ketdangsuba nung chairperson dak tulu ka keta lir" ta paisa metetdaksü.

"Urban council shiai DUCCF sabang ajanga Dimapur renloktsü aser aintsü atema külem alizüng ayutsüla. Council temi sorkar dang pei pei kiyong nung

nübortemi nungdakbatem osang sangoktsütsüla" ta Advisor-isa ashi.

"Merükmejuba indang osang prokshitsübaji kanga tongtipang aser nübortem dang Dimapur merüka ayutsü indang tebilemtsü khuret abentsü tesayuba agütsütsüla" ta Tovihoto-isa ayongzük.

Iba sentong nung DUCCF president, Tsenthungo Nyamo-i Advisor Tovihoto Ayemi dang megaphones agütsüba atema pelaba metetdaksü.

Watsü Mungdang-i International Women's Day ayongzüka amung



Watsü Mungdang-i ayongzüka 'International Women's Day' sentong Mokokchung town nung takok ngua agir külen telok külemi tangokba noksa nung angur. Mokokchung, 8th March, 2022

Mokokchung, March 8 (TYO): "Telung Tema Toburajung" omen dak rangloker Watsü Mungdang-i 'International Women's Day' sentong tajung ka yangi Mokokchung town tiyong nung ayongzüka mungogo.

Sentong tongmelang ka dang amai dang saka Mokokchung nung aliba Naga kin balala nungi tetsürtem aika adenshia kanga meraketa agi. Sentong nung Watsü

Mungdang tir Wt. S. Arenla Longkumer-i tarur ajak pelaa agizükba o jembi, Mokokchung town Baptist Arogo, Assoc. Pastor (W) Wt. Shilula Imchen-i Lai o nung ajemdaker tayongzüka o tulu bener arua lemsatep. Advocate Wt. Mapujungla Pongen-i 'International Women's Day' amungba teratet agütsüba den linük temzüng kübok tetsür temeten indang kar metetdaksü.

Watsü Mungdang sanen luden züngsem, Wt. T. Arenla Ao iba sentong nung menden liasü, Wt. Lipokmenla Ozüküm-i ken tajung ka tena t e s e n t e p e r t e m saksalemdaksü. Süngkomen Baptist Arogo Assoc. Pastor (W) Wt. Imtimenla-i temoatsü meshia sarasademer sentong tenzük aser telok külemi tenüngsang agüja sarasademer sentong tembang.

Changtongya Town nung International Women's Day amung



Dimapur, Metsüremi/March 08 (TYO): NABARD Nagaland Regional Office aser NSRLM Changtongya Block ajanga March 8, 2022 nü Changtongya Town Longma Watsu Sungki nung International Women's Day anogomung munga liasü.

Iba sentong nung Watsu Telen Changtongya Town, Youth Ministry Changtongya Town Baptist Church züngsemtem, ward ajunga nungi chairman tem aser NSRLM Changtongya Block staff tem dena liasü.

Iba sentong nung Ochijunger NSRLM menden liasü aser Imyapangba, Associate Pastor Youth, CTBA ajanga Tsüngrem

temoatsü jazüka sarasadema liasü.

Amarjit Mangang DDM, NABARD ajanga sentong nung iba anogomung rateta ashi. Tetsür temi shilem aika agiteter aser ano tebur asoshi tembar ama lir, ta pai ashi.

Terenlok maparen nung tetsürtemi tongti shilem agiba atema pai tenüngsang agütsü aser ano maneni tarutsü asoshi inyaksü ayongzüka liasü.

A. Punaluba Longkumer Changtongya ajanga iba sentong nung "Gender Equality Today for a Sustainable Tomorrow: A male perspective" omen nung jembia liasü.

Anogoshi Women's Day amungtsü langa lir. Nüburtemi

tetsür temaba jenjangi ajungkettsü meranga, tashi agüja aser terenlok agütsüra, mesüra kasa maongka agütsüra, ibaji ajanga teburtem tashi kodanga mesamatsü, ta pai ashi.

Watsu Telen Chagtongya Town tir, R. Anungla Aier ajanga 2022 küm iba anogomung omen nung akemdaker jembia liasü.

Aotsür tensa aser jenjang indang jembiba mapang, dangar dang nungi asenok kanga agi tia takaba lir, kechiaser asen loktiliba nung asenoki maongka jenti agir, ta lai ashi.

Asen tsürabur nungi yimya tajungtem senmang amangba indang lai süoka liasü.

Mokokchung Municipal Council ajanga metetdaksür

Dimapur, Metsüremi/March 08 (TYO): Dokan osettem tetsüing agi jajaba lenmang/gari lenmang nung nangdena ayuba ajanga nüburtem nem timtem agüja aser gari sadema mesenzütetba atema taoba mapang totuyuba agütsüba den bendenloksema ano Mokokchung Municipal Council ajanga sangdong ka nung, Mokokchung Municipal Council kübok lenmang nung osettsüset yua alibatem March 12, 2022

tashinung azüingtsü/mürektsü asoshi dokan kibur/business establishment ajunga nem metetdaksüogo.

Iba anogo sülen MMC ketdangsürtem mapang shia item tesemtem semdanga jajatsü aser iba totuyuba sülen manidaker nem tapet temerenshi agütsütsü, ta ADC aser Administrator, Mokokchung Municipal Council, Shashank Pratap Singh, IAS ajanga sangdong ka nung ashi.

Arem shiruru wazüka ayuba nung training agütsü

Dimapur, Metsüremi/March 08 (TYO): Forest aser Police Personnel atema "Wildlife Law Enforcement and Counter Wildlife Trafficking and Biodiversity Conservation" nung training ka March 8, 2022 nü Conference Hall, Forest Mokokchung nung agia liasü, kong nisung 50 arua shilem agia liasü.

liasü aser Tiarenba, Forester-I ajanga training nung angazükbatem lemsatapa liasü.

Kasa sentong nung Atangba Sub-Inspector police ajanga ananü training nung arem shiruru dak sendakba mapa tamajung balala angazükba indang ashi.

Dev Prakash Bankhwal, IFS (retired PCCF, Wildlife) aser Chief Wildlife Warden, Assam aser Team Leader WCS ajanga sentong nung tejangraba tulu nung adenba atema pelaba lemsatep aser maneni angazüktsü ajungshia liasü.

Iba training ya Nagaland Forest Department, the Wildlife Conservation Society (WCS) India aser Nagaland State Biodiversity Board (NSBB) ajanga ayongzüka liasü.

Iba training nung arem shiruru shibelenba, Wildlife Protection Act 1972, wazüka ayuba tesemtem, Community Reserves and Biodiversity Conservation, Wildlife and Biodiversity laws tem mapa kuma inyakba aser Wildlife crimes bushisüngdangba amala awajema liasü.

Satya Prakash Tripathi, IFS (retired PCCF & HoFF), Nagaland aser Chairman, State Biodiversity Board, Nagaland ajanga Wildlife crime aser Biodiversity Conservation for Forest and Police Personnel indang training maneni agitsü ayongzüka liasü.

Sentong nung Aosungla Forester-I, Mokokchung Forest Division ajanga melepzüng o jembi.

Iba training tembangba sentong nung Dr. Sentitula, IFS, DFO Mokokchung menden

DHO Kohima ajanga Low Cost Preservation Unit nung training agütsü

Kohima, Metsüremi/March 08 (TYO): Kohima kübok yimtsüing balala nungi nisung 25 tashi Low Cost Preservation Unit indang training March 8, 2022 nü agia liasü. Iba training ya Mission for Integrated Development of Horticulture kübok District Horticulture Office Kohima nung agia liasü.

chiyongtsü lir, kechiaser item yagi nüngdakba mineral, vitamin aser fibre agütsür. Kuli balala mechi item chiyongtsü peria anguba junga mamshiteter aser süngjang-lijang aser aonsotsü shilem 25-30 shi shia indoker.

Süngjang-lijang aser aonsotsü timba mapang ka nung dang angur aser shisa aor. Junga adokba mongpu nung peria adoktsü akok, saka belenshitsu facility peria maliba mesüra packaging material majungba ajanga item ya jila nung bener oa meyokteter.

Sentong tenzükba jembiba mapang DHO Kohima S. Senka Jamir ajanga linük nung district ajunga nung kasa terenlok alitsü nükjidong nung tenzükba One District - One Product (ODOP) indang lemsatapa liasü.

Cold storage facilities junga maliba ajanga mongpu masüdang ayoktsüsa rizünga meyuteter. Anungji tsünürtemi jenjang ajema ayokba kisüing masü saka parnoki züsentetba raksar aser takoksa ajurur, ta pai ashi.

Region ajanga nung socio-economic tsütsü lirumedema renloktsü asoshi District shia nungi Product ka-ka shimteta temaba jenjang ajungkettsü nükjidong nung iba sentong ya tenzükba liasü.

Anungji Senka Jamir-i süngjang-lijang aser aonsotsü adokba yimtsüingtem nung cold storage facility amenoktsü/tuluba akumtsü nüngdaker, ta ashi.

Product shimteta aliba jangjatsü, angatettsü aser iba dak sendakba timtem bentettsü nükjidong nung ODOP sentong ya tenzükba lir. Nagaland nung aliba district tem densema India nung district 739 atema New India mangdang asangsang akumtsü asoshi ODOP ya tenzükba liasü.

Ano mapa talang-lang meraksai wazüka ayutsü mechi süngjang-lijang aser aonsotsütem ya pickles amala yanglua sen kumdaksütsüla, aser iba atema department ajanga training agütsür, ta pai ashi.

Iba asoshi Department of Horticulture ajanga Kohima District nung ODOP nükjidong tongtetsü asoshi süngjang-lijang aser aonsotsü indang Low Cost Preservation nung tali temolung agütsür, ta senka Jamir-i ashi.

Technical session mapang Deputy Director (Marketing), Directorate of Horticulture, Meyasashi ajanga Dry Ginger, Salted Ginger, Ginger Pickle amala süngmok agi yangluba chiyongtsütem yanglutsü training agüja liasü.

ODOP den lirumedema training mapang süngjang-lijang aser aonsotsü meraksai ayutsü yimyattem angazüktsü, ta pai ashi.

Maneni DHO Kohima ajanga training agirtem nem low cost preservation kits tem lema agüja liasü.

Süngjang-lijang aser aonsotsü ya nisung temang nung tongtipang



(Abelen) March 08, 2022 nü alima ajunga den külemi Nagaland nunga tesem balala nung Alima Tetsürtem anogomung amongba sentong nung, maparen tapu balala nung nüburtem asoshi mapa tajung inyaksür takoker Aotsürtem nem konang nüngsang balala agütsüogo. Item rongnung Longleng nunga Chief Medical Officer, Dr. Obangjungla nem District Administration, MSK, World Vision, OSC aser Phom Baptist Christian Association purtem longjemer ayongzüka sentong nung "Phenomenal Women Award" agütsüogo. Lai parnok dang pelaba o ka ashidang, iba ama konang nüngsang anguba ajanga ano pei mapa nung tali temerangba inyaksü ajungshir aser iba konang nüngsang ya tetsürtem ajak tenüng nung agizüker aser par tsürabur aser kinungbo teyari bilemteter ta metetdaksü. Iba konang agizükba noksa nung angur.

(Achiji) Mrs Imdangla (Asür Koramoa, ex-minister kinungtsü) alima tetsürtem anogomung nung NSCW 2022 Award agizükba noksa nung angur. (Kohima, March 08, 2022).

Tripura nung maneni BJP sorkar arudakjang: Amit Shah



Mongulbarnü Union home minister Amit Shah-i Agartala nung aliba Swami Vivekananda Stadium nung lokti senden ka nung jembidang tangokba noksa nung angur.

Agartala, March 8, 2022 (Agencies): Mongulbarnü Union home minister Amit Shah-i Tripura nung dang BJP nem maongka agütsütsü ayongzük.

Sangküm Tripura Assembly election agütsü lir.

Agartala nung aliba Swami Vivekananda Stadium nung lokti senden ka nung jembidang "Küm pezü jungogo. Onoki ano maongka ka meshia nenok kidangi arutsü" ta Amit Shah-i ashi.

"Saka, tangbo onoki inyaktetba indang report bener nenok dangi arutsü. Taruba election matongdang 2018 election manifesto nung nangzükba ajak inyaksü" ta Amit Shah-isa metetdaksü.

Tripura nung ano kümsük ka atema sorkar inyakra BJP-i Tripura ya state mezüngbuba kümdaksütsü, ta paisa ashi.

BJP-i Tripura nung takok anguba ya Amit Shah ajanga lir ta züngshir.

Gomati district nung paisa Tripura Sundari Temple nung silver doors lapoktsü.

Agartala tezülen aliba Anandanagar nung pai National Forensic Science University yanglutsü atema lung azüngtsü.

"Northeast ajunga nung science university indang mezüngbuba campus ji iba ya lir. Iba nung narcotic forensics ama UG-PG courseslir" ta pai ashi.

Amit Shah-isa Tripura sorkar indang scheme tasen ana

metetdaksü.

"Women's Day tenüng nung Tripura sorkari sorkar mapatem nung tetsür nem 33% lezmüksütsü scheme tasen ka tenzüker. Ano, süngolu nung mapa inyaktertem atema scheme ka tenzüksür" ta pai ashi.

"Institutions of National Importance nung admission agiba tetsür ajak nem loan atema 3% interest ajemtsü" ta Amit-isa ashi.

"Northeast ya timtem aliba tesem ka ta ser senzuka toktsü. Telungpur khuret, mozü shibelenba aser tensa mesüngjem liasü. Tang PM Modi lenisüba kübok Northeast shishilembaba lenmang nung jajar" ta paisa ashi.

Mizoram-i Assam Police agientsü meranger: Home Minister

Aizawl, March 8, 2022 (Agencies): Mizoram-i Assam den arrtsüa aliba Aitlang, Buarchep aser Saihapui 'V' tesemtem nungi Assam police teseptem agientsü meranger, ta home minister Lalchamlia-i ashi.

Mizoram-i Assam den kilometre 164.6 agi arrsütepa lir. Yaküm June ita arrtsü tsütsü mangatetep adokba sülen Aitlang, Buarchep aser Saihapui 'V' tesemtem nung

Assam police teseptem amenoka lir.

Mizoram sorkari Assam den arrtsü anasa state police tashi itdaksütsü atema mapa inyaker, ta Home minister-isa ashi.

Mizoram-i August 20, 1987 nü sangdongba Cachar indang arrtsü agizüker aser ibaji Assam den arrtsü shitakba lir, ta pai ashi.

"Mizoram sorkar aser Mizo nungertemi 1875 sangdong

nung ammeta lir saka Mizoram-i arrtsü anasa tesem kar akoksaba meyipa angutsü asü masü'ar meshiteter" ta Lalchamlia-i metetdaksü.

Yaküm Noevember ita Mizoram chief minister Zoramthanga aser Assam chief minister Himanta Biswa Sarma na Union Home Minister Amit Shah lia ajurutep aser iba mapang pei pei state nung arrtsü mangatetep asoshi panel tem tentetsü teletetba agi.

Majuli by-election nung enoktsür 71.76% liasü



Guwahati, March 8, 2022 (Agencies): Assam kübok Majuli (ST) Assembly constituency by-election nung vote enoktsür 71.76% liasü ta Chief Electoral Officer Nitin Khade-i ashi.

Polling station 203 nungi EVMs ajak strong room nung yuogo aser security akanga lir, ta pai ashi.

Majuli (ST) Assembly

constituency nung vote enoktsür ajak agi nisung 1,33,227 lir aser iba nungi nisung 95,600 shi kati vote enoktsüogo.

Iba constituency nung toktepertemji BJP candidate Bhuban Gam, oppositionkülem candidate Assam Jatiya Parishad (AJP) züngsem Chittaranjan Basumatary aser SUCI(C) nungi Bhaity Richong nung lir.

Union Minister for Shipping, Ports and Ayush, Sarbananda Sonowal-i menden toktsüba ajanga by-election agitsüsa aküm. September 27, 2021 nü pa Rajya Sabha nung tetokteper shinga melii takok angu.

Taoba Assam Chief Minister Sonowal-i 2016 aser 2021 kümsük anaben atongtepa Majuli constituency nungi takok nung liasü.

EXPRESSION OF INTEREST

Dated Shillong the 7th March, 2022
No. NERCRMS/X/MKT-3 NERCRMS, Shillong invites proposals from interested firms to work as **Primary Aggregators for Handloom & Handicraft activities.** For more details, log on to www.necorps.org.
Last date for submission of the sealed proposal is 21-03-2022 at 4 P.M.

Sd/-
Sr. Manager (Mkt., Value Chain & Project Management)
NERCRMS, Shillong

EXPRESSION OF INTEREST

Dated Shillong the 7th March, 2022
No. NERCRMS/X/MKT-4 NERCRMS, Shillong invites proposals from interested firms to work as **Society Partners / Associates.** For more details, log on to www.necorps.org.
Last date for submission of the sealed proposal is 21-03-2022 at 4 P.M.

Sd/-
Sr. Manager (Mkt., Value Chain & Project Management)
NERCRMS, Shillong

Kokrajhar nung prangpong-injang aika angu



Kokrajhar, March 8, 2022 (Agencies): Assam kübok Kokrajhar nung police-i prangpong-injang aika angu.

Osang tejangja ka angazükba sülen Assam police-i prangpong-injangtem ngutet aser iba ya NDFB teloktem indang asütsü ta temolung malemer.

Kokrajhar district kübok Mahamaya Reserve Forest nung prangpong-injangtemji

angu.
Iba nung Israel made UG rifles 2 den magazines 4, hand grenades 16, pressure bombs 22 aser caps 22 dena lir.

"Iba ya Kokrajhar police atema takok tulu ka lir. Anogo ananü Guma Reserve Forest kübok Mahamaya arem nung bushitepa aoba sülen angu" ta additional DGP, LR Bishnoi-i ashi.

Arunachal tsür Tage Rita-i Nari Shakti Puraskar angu

Itanagar, March 8, 2022 (Agencies): Women's Day nung Arunachal tsür Tage Rita nem Nari Shakti Puraskar agütsüogo.

Tetsür entrepreneurship ajungketba atema Mongulbarnü President Ram Nath Kovind-i la nem sempet agütsü.

Tage Rita ya engineer ka lir saka lai mapa toktsür entrepreneur ka aküm. Lai 2016 küm Lower Subansiri nung 'Lambu Subu Food and Beverages', Naara-Aaba "wine" lapok.

Tage nem United Nations Women Transforming India Award-a agütsüogo.

Nari Shakti Puraskar ya tetsür entrepreneurship aser alima nung local product ajungketba atema agütsür. Tage Rita-i lapokba winery



ajanga küm nung wine 60,000 liters shi adoker aser Rs 4.5 crore ajangzüker.

Iba winery ya Hong Village Ziro nung lapoka lir aser lai India nung mezüngbuba organic kiwi wine yangluba sülen Naara Aaba pear aser plum wines yanglur.

Nari Shakti Puraskar ya Ministry of Women and Child Development ajanga agütsür.



TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 09, 2022

Tetsürtem anogo aser mapa

Küm shia amongba ama, taküm 2022 küm asoshia yashi March 8 nü alima ajunga den külemi Nagaland nunga tesem balala nung tetsürtem anogomung mongogo. Iba anogomung sentong ayongzükertemi mapa tajung apiteta inyakbatem rongnung, pei inyakba wadang nung tangari 'hau, laisa tajungba inyaktetogo' ta shitetsüsa takok ngua inyakba tetsürtem nem tenüngsang sempet agütsüba ya asütsü. Iba ama tenüngsang agütsüba mapatem agi sempet angurtema pelar aser parnok amaji inyaksü tangartema ajungshir. Atangji, shitakba agibo tetsürtem anogo ya teburtemiang ayongzüka mongtsütsüla, kechiyong tetsür shiai pei tsürabur, pei kinungbo, pei chirnurtem aser pei adianu kinungertem meima yariba aser anepaluba temeimji kecha dena medemdangtsü makok. Asen loktiliba aser sobaliba nung, kodang tetsürtemi abenba khuret aser temeim mapatemji jungjunga bilemdangdir, tanü putu nungbo tetsürtembo teburtem maliyonga litettsü saka tetsürtem meliang teburtembo melitettsüsa tensa tia aika ajurutsü. Ajisüaka, tebilemdangtsü kaji, asenok sobaliba nung ya mapa ajak tetsür aser tagitsübo ajunga tebur lemzük ama reprangtetsüsa asenoki inyaker. Tanü tashitemetet putu nung, item onüktemji yashi ama tetsürtem anogomung amongba anogo nung dang masü saka anogo shia asenok rongnung shisalemsatepa jembira, iba jagi tetsürtem nema akhüm aser mulung anisüngzük tulu agütsütsü. Atangji, yashi alima tetsürtem anogomung onüka iba tsütsüji atsünga, "Tarutsü anogotem asoshi bilema tetsür o tebur na tsüngda kecha telemsa melii khuret aser maongka kasasa lemsatepa agitsü," nüngdakba indang jembia mongogo. Iba jagi asenok ama akhidang nungi tebur yimli ta ser aruba kin aser nübortem dang putu den peta asenok sobaliba melenshia aotsü nüngdakba indang tangatetba ka agütsüner. Ano, tetsürtema süaka alima yimya asünungji, nisunga memesük, tajemrep tia nung alirtem aika lir. Aji oda, tetsürtem anogo nung tetsür tajungertem asoshi dang masü saka pei taküm agi piesasa nümamedangteti aliba tetsürtem taküm tia indanga jembia, parnok taküm jenjang ajungkettsütsü atema shisalemsatepra, tetsür o tebur na kasasa khuret abenba aser maongka agiba anogo tajung ka aru yongyaa jembibaji asangsang nung yakta ataloktsü. Tanübo akhidang tsürabur mapang nok nü amshia lepteptsüngtepba putu masü saka rara nunga gari aser tayimtsü amshia injang prongpong aser bomb amshia raraba putu lir, anungji tongpang rara nunga tetsür tebur kecha balala mali nokdaktetsüba putu ka nung asenok alir. Aji oda, asenoki tetsür o tebur na bendangdi asüyonga mebendangtetsüsa alima inyakyim ajunga melenshia odagi. Atangji, asen sobaliba nung tebur yimli ta jembiba ya tetsür mezüngmeshiba mapa ka masü saka tebur khuret ajak bena tetsür taküm kümzüka ayutsü merangba nungi tenzüka sobaliba ka lir. Ibaji kodang tetsürtemi angatetdir, tetsürtemia teburtem tenüng mesangiang melitettsü. Iba tangatetba nung tanü putu nung tetsür o tebur na yimten nung maongka kasasa agitsüla ta jembiba onük ya tetsür o tebur na tsüngda mangatetepi raratepba ola ka masü, saka joko alima putu yimya agi tetsürtemia yimten khuret abentsüsa akümba ajanga ola adoktsüsa akümer ta ajaki angatet nung junger. Atangji, tetsür o tebur na temeten aser shilem kasasa agitsü nüngdaka jembibaji maparen aika nung masü, saka yimten sabang nung shilem aginüba aser ali senmang alemba yimya nung tetsürtema teburtem den kasasa temeten alitsüla ta tangatetba ka dangi aruba ola ka lir. Iba jagi tetsürtema maparen ajak nung tali temerangba, tenendakba aser ochitashiba inyaksü ajungshir aser teburtem danga tetsürtem nem mapa dang masü saka maongka aser senmanga agütsütsü nüngdakba indang tangatetba agütsür. Iba onük ya küm nung khen tetsürtem anogomung nung lokti sabang nung jembir ayutsüba masü saka anogo shia pei atep nung apuani na tsüngda aser tanurtem rongnung shisalemsateptsüba onük ka lir. Iba jagiang memenui asen yimten aser loktiliba nung tetsür-tebur ta mali kasasa raktepa khuret abentsüba anogo ajurutsü.

OLEMSABANG Clean Election Yimyim

- Tayongtemjen Lemtur

(Yashi adok nungi...)

Political education aser clean election seminar: Metetba aser angajemba ajanga telemtetba agir aser temelenshi bener arur. Arogo nung nütüsung/nüburtem nem 'Participatory Democracy' ya angatetdaksütsüla. Arogo-i achayanga political education atema seminar tajung ayonga agitsü akok. Asenok tamanger rongnunga election nung shilem agiba ya tai ta bilemer. Karbo tai memenatsü atema political participation nungi atsünga alir. Iba ya kenyongi tai tangatetba. Tamanger tajung kati ochi yimden yangerba nung tim shilem magibaji tai. Küm 5 tashi yimden yimsüsüba (govt) mejungra nübursa kangshitsü. Anungji itemi teinyaktsü ya shisadangtsü junger:

- Arogoi Tsüngrem dang election matongdangsa nü nüburttem mulung merüktetdakang ta revival asoshi tang nungi arogo nung kibong shiai shilem agitetsüsa chain of prayer sentong tenzütsüla.
- Election nung yimdeni tashiyim amshiba mapatem, tat. agi, azükba, ki shibangtsüba, ki rongdoktsüba, raksatsüba, senchi achiba, aridokba aser jentokba mapatem anema arogoi nunga ta yimjak nung shitetsüla. Yimden nung meshitak inyakba anema menoktaketba arogoi menüngdaker, kechiyong yimden mapa memerükbatem merüktetsü asoshi arogo jatet. Arogo ya temeshi purtem sentepa tenüng sangtepa kazütsüba telok ka masü, saka nüburttem menendaksüba mojing mapa anema tongpang nung noktaksü jatetba purtem lir.
- Election nung shilem agiba aser vote agütsüba tai masü, shilem magiba aser vote enoktsü maobajiang tai ta nüburttem nem angatetdaksütsüla.
- Election anogo ya sensosanger ajak asoshi anemponga yimden nung shilem agitsüba temeshi anogo ta züngshitsüsa nüburttem nem tangatetba agütsütsüla.
- Election mapa tenzüka Hindu nung candidate-tem Varanasi ama parnok temeshi yimti aser tenla kidang oagi putir ajurua sarasadem tekülem agiba ama, asenok electioni aiertema sen aser yi masü Tsüngrem bushia tenla kidang sarasadem tenzütsü ajungshitsüla.
- BJP ama yimden teloki Ayodha nung Ram Temple yangluba aser Hindu nung tanga yimsü dangi memeyipdaksütsü, nashi shi meyokdaksütsü ozüng zünga inyakba ama Khristantemia Khristan yimsü ajanga yimden nung takok bener arua Tsüngrem yimli ulushia yimsü asütsüla.
- Communal political party, tat. agi., BJP ama arogoi tai ta noktaksüla.
- Party candidate masü pei yim senso candidate shimbaji tai, iba yagi election menentsür ta ABAM office nungi ajangajanga yimjak nung sangdong ka agütsütsüla. Tashi angatsü mangatsüba pei mulung, saka arogoi tai dang tai ta shia memerük, memeshiba mapatemji Yisu tenüng nung ola tulu adoka arüja aitsütsüla.
- Election merüka agiba ajanga tajangzük angutsübatem zülur proktsüla.
- Clean election atema aser ochimashi mapatem balala anema book marker amala yanglua prokshitsüla.
- ABAM Principles of Clean Election Charter ka yanglur tenla kima shia signboard tulu nung zülur azünga ayutsüla.

Clean election tajungba nung takok ngua inyaka bener aotsü asoshi Tamsüwati Kichu-i ashiba ya süoki ia maka kuma inyaksüla. Pai ashir, "Arogo nung tenzükertem, tenzüka wadang balala nung alirtem asenok khen tama, clean election indang ya süoki ia angatetter meranga inyaksü, nungitsü, amaliteptsü, commitment tejangja agitsü nüngdaker. Hau, asenok kanga junga clean election atema inyaker tenzükertem aika lir, saka ano aikati jembyong serious süa magir. Anungji khen tenzükertem kümshitsüla."

Yimden Teinyaktsü kar

Aortem yimer candidate/tsükong candidate shimba yimya ya anentsüla, iba shimba inyak tashi nungbo election nungji timtem ajurutsü. - Esther (Khar)

Taoba mapang election nung clean election maparen tenzüka ajanga nüburttem aikati election sen magiba aser karibo meyiptsüba otsü lir. Ano tongtibang teinyaktsü kar: (a) Yimtak Yimtsüng nung permanent residents dang E roll nung zülukoitsüla. Yamaji town nung alira kasaji amshitsüla. (b) Yimer süaka town nung oa settled süa alirtem katitsüla. (c) Election mapang bendanglen alirtemi arua rongsen mamshidaksütsüla shibai yamaji inyakba metetdir election matem tashi yimtaki arutsü memelatsü ozüng takang yanglutsüla. (e) Arogo, yimdeni, züngalepzük, aser students body lungjemer takok tashi proxy voting memelatsüla. (f) Party balalai polling officer's team nem süpokrem agütsübatem aputsü atema lanur telungjem asütsüla aser tim temerenshi akhangtsüla. (g) Candidate declaration asüi arudang lokti chiyungba yimya ya noktangtsü yimdeni ozüng yanglutsüla. (h) Grassroot level nung clean election education agütsütsüla. (i) Groups balalai candidate ka nem dang vote agütsütsü ta media nung agütsüba mesüra ozü telok iba party nung atener ta sangdongba ya Newspaper nung matoktsütsü temzüng yanglutsüla. - Imti Jamir

Pei yimtsüng aser tsükong tangatetba mayutsüla: Yimden ajanga candidate shimdang yimtsüng aser tsükong pukümer masütsüla. Candidate shiba nüburttem asoshi tetemsü iba pukümerji asütsüla. Yimtsüng aser tsükong tenüng aginügang aiben candidate tajung madoker.

Political candidate (Jurila) den tezüngzüktep mayutsüla: Election matong dang nungi yimtsüng aser lokti kar nungbo candidate den tezüngzüktep agiadoker alir. Iba tangatetba ajanga 'Free and Fair' election nükjidong mataloker. Ano iba yimya ajanga nüburttem 'Right to Vote' maongka maka kumdaksür.

Free and Fair election asoshi temzüng ozüng yanglutsüla: Free and Fair election agitsü asoshi yimden tashi ajanga temzüng-ozüng takang yanglutsüla. Candidate shia iba temzüng-ozüng nung hai aura kadaktsütsüla. Election mapang sen malemstü, yi temesepba mamshitsü, tashiyim agi votes capture masütsü, proxy vote magütsütsü, election mapang chidiyungti yimya malitsüla, etc. Yimden ajanga voters kechi nung alir idakji pei tenüng bener odaktsütsüla. Yimdeni teküboklen agüja aliba ya inyaktet nungbo koda jungla:

- Bendanglen alirtem election mapang sen aser yi bener arua yimtaklirtem taküm, kibong aser tarutsü tia raksatsüba ya mepelar ta metetdaksütsüla.
- Public indang auyaba sen agi public vote alia election-i shinga maitsüla ta yimjak nung sangdongtsüla. Sen agi tata menden alitsü merangertemji odia aitsütsüla aser sendoktsüla.
- Tatar senden nung o mejembitettsü purtembo electioni maitsüla, kechiyong MLA-ji tatar senden nung pei nüburttem nüngdak jembitsü yoker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sudan nung tekülem ki shibanga ayu, lenirtem apu

Juba, Metsüremi/March 08 (Agencies) : Taoba ita Sudan nung Muslim yimsü akhanga amangertemi arogo lenirtem pua asüngdangya asü aser tekülem ki shibanga yutsü, ta osangtem ajanga ashi.

Al Jazirah state kübok Khartoum southeast tsütsü mile 85 shi pilar Al Hag Abdalla nung aliba Sudanese Church of Christ (SCOC) indang tekülem ki ya Muslim nungertemi February 21 nü shibangtsü, ta SCOC nung evangelist Dalman Hassan-i ashi, shiba February 27 nü apu aser kasa anogosa arogo pastor den külemi chioka liasü.

Arogopuri Islam dang yimya tamajung sayua Hokulbarnü Muslim nung sarasademba mapang parnok adenshi ta Muslim nungertemi tai tongloksü, ta Hassan-i ashi.

"Parnok rongrong adoka danga yimsü mezüngmeshi," ta iba arogo anema ken o ka Al Hag Abdalla ketdangsür nem agütsüba nung shia lir, ta Hassan-i ashi.

Khristan yimsü agizükdaktsütsü mechi arogoi tanurtem nem chiyongtsü agütsü aser tekülem ki yanglutsü atema parnok li agi ta Muslim nungeri aitsü, ta arogo züngsem Kotti Hassan Dalman-i ashi.

Iba ali ya Catholic school ka indang lir aser Muslim

yimsü akhanga amangertemi ali indang kuli tiazü agütsü, kechiaser parnoki yangji Khristanpur maginer, ta arogo züngsemtemi ashi.

Evangelist aser Pastor Stephanou apuba police tem nem February 27 nü ali kibur indang kulitem agütsü.

"Linük tesem ajungalen aliba amangbapur dang onok atema sarasademtsü ajungshir," ta arogo lenirtemi social media sangdong ka nung ashi.

2019 küm taiba Tir Omar al-Bashir yimsüsüba tembangba sülen Sudan nung tamangba yimsü temeden tsütsü terenlok lia aru, saka October 25, 2021 nü mitkartemi tashiyim amshia sorkar atsüngdokba sülen yimsüsüri anir reshikangshi tenzüker.

Küm 30 yimsü süa aruba sülen Bashir ya 2019 küm April ita atsüngdok aser transitional civilian-military government ajanga Islam nung ozüng tesashi kar indoka liasü.

October 25 nü mitkartemi sorkar atsüngdokba ajanga Sudan nung aliba Khristanpur molungjang nung tetsübu aidadok.

Mitkartemi tashiyim amshia sorkar matsüngdokdang aser atsüngdokba sülena 'non-state actor' temi maneni

Khristanpur reshikangshir. Open Doors ajanga alima nung Khristanpur alitsü asoshi linük tamajungtiba asadangba 2022 World Watch List nung Sudan ya jenjang 13 buba nung lir, kechiaser non-state actor temi lendong agütsüba manener aser national level nung tamangba yimsü temeden ozüng yanglua aliba local level nung mapa kuma mamshir.

Sudan ya temaba jenjang ter rongnung liasü, saka 2021 World Watch List nung jenjang 13-i alua liasü.

Tekülem ki tem raksatsüba maparen tajemba kuma tensa terabo ajunger saka conservative Islam temi lokti amokbanga lir, anungji tekülem ki yanglutsü asoshi temelaba agiba densema Khristanpur timtem balala ajurur, ta US State Department indang International Religious Freedom ajanga ashi.

2019 küm US State Department ajanga Sudan ya Countries of Particular Concern (CPC) nungi agenja watch list nung yutsü. State Department ajangasa Sudan ya Special Watch List nungi December 2020 nung agiena liasü. Sudan ya 1999 nungi 2018 tashi CPC nung liasü.

Sudan nung nütsüng yongsük million 43 dak tema aliba nung Khristanpur ya million 2, mesüra shilem 4.5 lir.

Samaritan's Purse Ukraine Relief atema NASCAR-i sen \$302,000 tenla

Las Vegas, Metsüremi/ March 08 (Agencies): NASCAR nung tejangja team kati teyari agütsüba ajanga Ukraine nung rara mechi timtem ajurua alirtem sen \$300,000 dak tema teyari angutsü.

Las Vegas Motor Speedway nung Pennzoil 400 aliba mapang Hendrick Motorsports ajanga laps 51 nung takok anguba sülen Samaritan's Purse Ukraine relief atema sen \$302,000 tenlatsü.

Hendrick Motorsports aser iba telok indang kibur Rick Hendrick-i sen \$200,000 tenlatsü nangzük aser par team-i mezüng asüba lap shia ano sen \$2,000 agütsütsü nangzük.

Team züngsem Alex Bowman-i iba race nung takok angu aser lap 16 nung pa mezüng liasü, aser külem team nungi Kyle Larson ya lap 27 nung mezüng sür tanabuba jenjang tongtet. Ano Hendrick züngsem William Byron ya

jenjang pungo buba nung tembang aser lap ti nung pa mezüng liasü.

Samaritan's Purse ya nondenominational Christian ministry ka lir, aser parnoki Ukraine refugee tem kidanger linük nung jenoka alir nem teyari agütsütsü. Iba telok nung Franklin Graham tir lir aser parnoki region nung field hospital ka lapoka lir.

Larson indang gari nung Samaritan's Purse indang website inoka liasü aser ano "Ukraine yariang" ta zülua liasü.

"Alima ajunga ama ozü kibong-ia Ukraine tensa tamajungba akumba taoksa aser tejashi nung repranga liasü," ta Rick Hendrick-i ashi.

"Tai maket tanurtemi timtem ajuruba agi tali kongshi. NASCAR ajanga tashi tait sapang ka onok nem agütsü, aser timtem nung alir yaritsü asoshi ibaji amshitsü tetemsü ama ni amanger."

Hendrick Motorsports ajanga ano danga NASCAR

fans tem dang Ukraine nung timtemer yaritsü atema tenlatsü ajungshia liasü.

"Samaritan's Purse ajanga süang mesüra danga tentet ajanga süang, onoki Ukraine yaritsü ajungshir. Lendong timtem ajurua aliba asenoki memetet amai yutsütsü makok," ta Hendrick-i ashi.

Graham-i Hendrick Motorsports dang pelaba lemsatepa Deobarnü tweet ka nung, "Rick Hendrick aser @TeamHendrick ajanga takok anguba atema tepela lemsateper - aser tang timtem mapang Ukraine nung nüburtem yaritsü asoshi nenoki aria bilema mapa tajung inyakba atema kangasa pelar," ta zülutsü.

"Ukraine nung nüburtem timtemer aser tang iba mapang teyari aser sarasadem nüngdaker, Parnok dang Yisu Khrista dak tamang ayutsü sayuba mapang parnok nüngdakba peritsüner," ta taoba hopta Graham-i shia liasü.

ANOGO ABEN TSÜNGREM DEN

Taküm tasen

Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.

Yisu ne mulungi aitang ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Züngpung ni ne dang shidi, tanaben mesora, nisungi Tsüngrem yimli mungutetsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüksü. Tanaben asoba agi dang aji inyaksü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemea küm daksütsü ashiba nai angashitsü akok. "Tang na "Khristan süa nai tesüba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemstüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümstü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüksü bushir. Shiba dang nai amangtsü?

ABAM Social Concern ajanga Differently-abled Persons atema sentong ayonger

Naga Imai Khristan Yimsü arur Küm 150 jongmong nüingtem nung ABAM Social Concern ajanga "Differently-abled persons asoshi sentong" Zone 8 & 9

Omen: "Tangula aliba kechisarena agi Pa sangang" I. Ken 150:6

Anogo: March 10, 2022
Tesem: Aoyimti Baptist Arogo

Sentong Tarensen

9:30Am-10:00Am : Tenüng züluba
10:00 Am - 10:30 Am

Okila : Rev. Dr. Mar Pongener Executive Secretary, ABAM.
Lal azüingtsü: Deaf Biblical Ministry, Dimapur
Tayongzükba 0 : Smti. Diethono Nakhro, Nagaland state Commissioner for person with Disability.
Ken ka: Ms. Imsujungla, Dimapur.
11:00 Am - 1:00 Pm

Arogo nung tenzükerem

1. Addressing the issues of Disabilities from Medical perspective :
Dr. Imlitemsi Ozüküm, MD (PMR) Senior Specialist, DDRC District Hospital, Dimapur

2. Addressing the issues of Disabilities:
Mr. Maong Jamir

Differently-abled persons: Saisapong mapang

1:00 Pm - 1:30 Pm : Süngo ajemba mapang
1:30 Pm - 3:00 Pm

Differently-abled persons nungi sempet lep sayaba

Tsüraburi ajangshiba nungi
0 temang: ABAM
3:00 Pm: Chiyungba mapang.

Dimapur, Metsüremi/March 08 (TYO): Asen limai Khristan balala ajanga sadema Yimsü arur küm 150 ajungba menjajatetba, mejimbitepba, benjongmong November 1-3, mangashiba aser oli ora 2022 nung amongtsü mesadem jenjang nung lir. Item sarasadema renemer. Iba adianutem den küm 150 ajangba tepela temoatsü lemsatsü asoshi ibai ayonger. ABAM-i iba ama sentong tulu ya mezüngbuba ayonga akar aser adianutem longsoa arutsü imlar. Iba sentong takok aser temoatsü nung mongtetsü asoshi ajaki sarasadem nung yaridaktsüner, ta Rev. Dr. Mar Pongener, Executive Secretary, ABAM ajanga metetdaksü.

OLONG PAITEP # 6105

1			2			3			4	
			5		6		7			
8										
			9							
	10									
									11	12
			13				14			
15						16				

- | | | | |
|--|-------|-----------------------------|-------|
| TIPILEN | | LANGTSÜNGLEN | |
| 1. Anenzükdak ki | - (5) | 1. Reprangdaksü | - (4) |
| 3. Asür mangyimba | - (5) | 2. ___ ur | - (3) |
| 5. Temulung nung shisadang | - (5) | 4. Kiojen yangludak | - (6) |
| 8. T ___ lu | - (3) | 6. _____ ait | - (7) |
| 10. Takdang temalen | - (9) | 7. Nagaland nung ayong ka | - (5) |
| 11. Tesa ___ a | - (3) | 9. Küm kasa purtem | - (5) |
| 13. Ajungbena temulungjang tongtonglatsü atu | - (5) | 10. Tetsüng tajemtdak | - (6) |
| 15. Tejen lai nung tesayur | - (5) | 12. ___ adenshi | - (4) |
| 16. Tsüngsak-mopung | - (5) | 14. Tsünösenbongtsü adokdak | - (3) |

OLONG PAITEP # 6104 TELANGZÜBA

- | | |
|---|--|
| TIPILEN : | LANGTSÜNGLEN : |
| 1. Kasa, 6. Rangben, 7. Mait, | 1. Khu, 2. Süjak, 3. Onük, 4. Oba, |
| 9. Poktet, 11. Ati, 13. Atasa, 16. Rür, | 5. Anü, 6. Ratet, 7. Mozü, 8. Ita, |
| 17. Rajang, 20. Lanu, 24. Nüngjem, | 10. Tar, 12. Tinu, 14. Salem, 15. Aja, |
| 25. Süra. | 18. Anünü, 19. Taju, 21. Ano, 22. Onü, |
| | 23. Kua. |



AROGO GENERAL MEETING KA NUNG ALOKBA AGENDA KA :

Alokba : Asenok tenla kidang ya pillow kar alia ayu nung ajungtsü südi.

Deacon sobongba : Kechi atema?

Alokba : Tekülem mapang nung anünüa-a amener nem mapangsüri tenla sen sarudang külemi lema agütsütsüba ati!

Deacon sobangba : Oh! Alokba

Lilir : WhatsApp

TANÜBO NAI LANGZÜANG

Q. 'SLINEX' ya India aser ___ tsüngda agiba bilateral maritime exercise ka lir.
 [A] Oman [B] Singapore [C] Sri Lanka [D] Japan


=====(Taruba adok nung onoki langzüsü)

YASHI ADOK TELANGZÜBA : Pew Research Center

AO OSHI ANGAZÜKDAK:
TANÜ ANGAZÜKTSÜBA OJANG

Mersü
 (n) aon ashitsü enokba süngjang/aonsotsü (Chilly)
 * Asenoki **mersü** lu ayimtsüla.

Mersüsembong
 (n) mersü anüka kümdaktsütsü asema bongdang (Chilly pounding container)
 * Tanü asüngbo **mersüsembong** ya yin agi yanglur.



NAI-A YA METETTER MA

MARCH 09 ANOGO ASOR TONGTIBANG NISUNG KAR:

- Explorer Amerigo Vespucci (1454)
- Leland Stanford, founder of California's Stanford University (1824)
- Composer Samuel Barber (1910)
- Actor Joyce Van Patten (1934)
- Soviet cosmonaut Yuri Gagarin, the first man in space, (1934)
- Country singer Mickey Gilley (1936)
- Actor Trish Van Devere (1941)
- Rock 'n' roll singer Mark Lindsay (1942)
- Rock musician Robin Trower (1945)
- Indian tabla player, musical producer & composer, Zakir Hussain (1951)
- Indian politician, diplomat & author, Shashi Tharoor (1956)
- Actor Oscar Isaac (1979)
- Actor Brittany Snow (1986)
- Rapper/actor Bow Wow, born Shad Gregory Moss (1987)
- Actor Cierra Ramirez (1995)

SUDOKU # 6144 **TELANGZÜBA # 6143**

7	2	3						7	5	2	1	4	8	6	9	3
	9		6	2	3	1		8	6	3	9	7	2	4	1	5
		1		8		2	3	9	1	4	3	6	5	8	2	7
5	1				2		7	6	2	7	5	9	4	3	8	1
	6	2				5	9	5	4	8	2	3	1	7	6	9
	4	7		3			2	1	3	9	7	8	6	2	5	4
			9				6	2	7	1	6	5	3	9	4	8
2			3			7	1	3	8	5	4	2	9	1	7	6
4			2	5				4	9	6	8	1	7	5	3	2

OJANG LUTEP # 5690

- TGAANR :
- AKTZÜOSÜ :
- MENEL :
- MASTAA :
- EIP :
- INANGSYAKSHI :
- ERAS :
- JEHINMBISÜ :
- KTSAZÜOÜ :
- ANGAMERNG :

OJANG LUTEP TELANGZÜBA # 5689

ZÜBO KETA YIRUTSÜBA DANG NUNGIBO TEBANG AGI TEMULUNGJANG YIRUTSÜBA TESASHIBA

TAN HOPTA ATEMA - KOMA SÜLA ?

Q. Center government-i aginüba ama, tendanga, Nagaland nunga tetsürtem atema menden 33% shiteta yutsür municipal aser town council election agi nunga koma süla ?



New Delhi, Mar 8 : Mongolbarnü New Delhi nung International Women's Day amungba anogo Union Minister for Health and Family Welfare, Chemicals and Fertilizers Mansukh Mandaviya-i, Best Women Vaccinators (COVID-19 Vaccinations) nem tetushi agütsüba sentong nung shilem agiba noksa nung angur.

Onoki takok tashi toktepogo; Priyanka Gandhi

Lucknow, Metsüremi/ March 8 (Agencies): Exit polls timbakati Bharatiya Janata Party (BJP)-i takok angutsü ta takzür aliba mapang ka nung Congress general secretary Priyanka Gandhi Vadra-i Mongolbarnü ashiba agi, lar party-i kanga meranga toktepogo.

"Onoki akokba tashi kanga meranga toktepogo. Result atema ata lidi," ta Vadra-i ashi.

Vadra, shiba Mongolbarnü Uttar Pradesh nung party indang 'Ladki Hoon, Lad Sakti Hoon' campaign kübok sentong ka len anitsü atema Lucknow tonga aru, lai "tanü Lucknow nung iba sentong ya party indang tetsür candidate 159 atema lir. Parnoki ajungai kanga meranga toktepba ya kanga tulu aser International Women's Day

amungba mapang asenoki parnoka benjungtsüla," ta ashi.

Züngsem 403 agi kümtetba Uttar Pradesh assembly nung sorkar kümtettsü atema menden 202 akoktsü nüngdaker aser exit polls temi BJP aser parnok den lokteper aliba party temi election ayong ayonga akoktsü ta takzütetogo.

News18-P MARQ exit poll-i, BJP aser parnok den lokteper aliba party temi menden 240, Samajwadi Party aser parnok den lokteper aliba party temi 140, BSP 17 aser Congress-i menden pezü akoktsü ta takzütsüogo.

NewsX-Polstrat exit poll ajanga, BJP-i menden 211-225, SP-RLD 146-160, BSP 14-24 aser Congress-i menden pezü mesera trok akoktsü ta

takziüogo.

Kasa mapang nung Times Now-Veto exit poll-i ashiba agi, BJP-i menden 225, SP-RLD 151, BSP 14 aser Congress-i menden teku akoktsü.

India News-Jan Ki Baat exit poll ajanga BJP-i menden 222-260, SP 135-165, BSP 4 nungi 9 aser Congress-i menden ka nung asem shi akoktsü ta sayuogo.

Maneni Chanakya-ia, BJP-i menden 294, SP-RLD-i menden 105, BSP-i ana aser Congress-i menden ka aser tangari menden ka akoktsü akok ta shiogo.

Uttar Pradesh nung election tatembangbuba shilem agiba sülen exit polls tem sangdongogo. UP nung vote tem March 10 nü azüngtsü.

Goa nung Congress & non-BJP lenirtem sensaksemdar: Chidambaram

Panaji, Metsüremi/March 8 (Agencies): Congress lenir tejen P Chidambaram-i Mongolbarnü ashiba agi, Goa nung Assembly elections vote mazüng tsüingda par party aser tanga opposition lenirtem sensaksemdar.

Goa nung constituency 40 atema vote tem March 10 nü 8 ako nungi azüng tenzüktsü. State nung election ya February 14 nü agiatokogo.

"Goa nungertemi onok nem simple majority agütsür alitsü ta onoki temulung lema bilemer. Ni taoba hopta dang nungi tang temulung talemba, kechiyong ni candidate ajak den sensaksemogo," ta Chidambaram-i interview ka nung ashi.

"Onoki tanga party tem den

inyaktsü mulunga lir," ta pai ashi. "Onok nukjildingji non-BJP front ka kümtettsü atema lir aser iba amala mesükba inyakyim ya India kübok tanga tesem nunga benoka inyakdar. Anungji Goa nunga kodaser kasa inyakyim ya benoka minyaktettsü," ta pai ashi.

Goa nung vote mazüng tsüingda Congress lenirtem AAP aser TMC lenirtem den tesendaktep yanglushitsü merangdar ta osang praongshiba mapang ka nung Congress leniri iba olen lemsatepogo.

Goa nung taruba sorkar kümtettsü atema pai tanga party tem den tongtepratepdar asü masü ta asüingdangba mapang Chidambaram-i, "ni indang indangabo sensaksem

masü saka Goa nung onok lenirtemi Goa nung tanga party lenirtem den sensaksemdar," ta ashi.

"Parnok ajak medemer dang. Parnok karbo sendaktepa lir. Parnok ajaki kati ka kanga junga meteta lir. Goa ya tila ka dang. Parnok sentong aika nung ajuruteper. Ozü party nungi lenirtem aser tanga party lenirtem joko anogo ishika sensaksema arudar ta kü dang shiogo," ta pai ashi. Chidambaram ya Goa election atema Congress in-charge lir.

Chidambaram-i s a , Congress party candidate temi party metoktsütsü ta ashi. "Takok ngua tongu candidate ajaki Congress party metoktsütsü ta temulung lema bilemer," ta pai ashi.

Jay Prakash Majumdar TMC nung denogo

New Delhi, Metsüremi/ March 8 (Agencies): BJP lenir tejen Jay Prakash Majumdar, shiba taküm January ita mintoka liasü, pa Trinamool Congress nung denogo. Pa Mongolbarnü party tir Mamata Banerjee matsüingdang Kolkata nung bendanga agüja liasü.

Party nung adenba sülen mapang tatsüka dang lir, pa TMC indang state committee nung züngoksemogo. Majumdar party nung adenba sentong nung education minister Partha Chatterjee aser Kolkata mayor Firhad Hakim na densema party nung tanga tongtibang lenirtem aikati shilem agia liasü. Majumdar party nung officially manioi tsüingda International Women's Day nüngtem nung sentong ka ayongzüka agiba mapang Banerjee-i o jembia liasü.

BJP-i, Majumdar den party

lenir Ritesh Tiwari na party nungi mintok. Tenati BJP anema jembiba atema show-cause shiti agütsüba sülen party nungi mintoka liasü. Tenaprongla ya BJP indang state vice-president liasü.

"Party inyakyim anema inyakba atema aitsür aliba bushisüingdang mesüzük tashi Majumdar aser Tiwari na khen atema party nungi mintoka atar," ta state BJP tir Sukanta Majumdar tetuyuba nung zülur agütsüba shiti nung shia lir.

2021 TMC-i Assembly election akokba sülen taoba Union minister Babul Supriyo densema BJP lenirtem aika TMC nung denogo. TMC toktsür aoba lenir Mukul, Sabyasachi Dutta aser Rajib Banerjee nungera party-i tanaben meyipa aruogo. Parnok timba Assembly election matong tsüingda BJP nung dena liasü.



Belagavi, Mar 08 : Mongolbarnü Belagavi nung Indo-Japanese Military Exercise 'Dharma Guardian' mapang India aser Japan nung sepaitem tangokba noksa nung angur.

LAC: India & China na senden 15buba March 11 nü amentsü

New Delhi, Metsüremi/ March 8 (Agencies): Ladak nung mangatettep adoker aliba süngjemshidaktsütsü atema India aser China na March 11 nü senden 15buba amentsü renemer lir. Iba senden nung Line of Actual Control (LAC) nung mangatettep adoker aliba tesemtem nung ken o bentettsü asoshi rangloker sensak asemtsü imlar, ta ken o jangja aliba ketdangsürtemi Mongolbarnü ashi.

Corps Commander jenjang nung sensaksem ya tatemsa January 12 nü kaogo, ajisiüaka ken o takok ngua sensak mesemtet, saka linük anapronglai ajaki agizükettsüsa arrtsü nung mangatettep aliba bentettsü asoshi maneni inyaktsü ta shiogo.

March 11 nü sensaksem ya India tsütsü Chushul-Moldo meeting point nung amentsü, ta ketdangsürisa metetdaksü. Galwan, Pangong Tso aser Gogra Heights nungi sepaitem anintsü atema senden asemen tashi menaka item tesemtem nung advanced weaponry den sepa 50,000 nungi 60,000 shi tang tashi mainshi lir.

March 11 nü amentsü aliba senden nung Hot Springs mesüra Patrol Point-15 nungi sepaitem anintsü atema sensaksemtsü imlar.

Hot Springs nung India

Army patrolling inyakyim nung kongshiogo aser Depsang Plains nung Chinese People's Liberation Army munga aliba ajanga India Army lenmang nung tetsükdaktsü adoker kong PP-10, 11, 11-A, 12 aser 13-i aoba lenmang densema lir.

Telok anapronglai sepaitem anintsü atema maneni sensak asema ya osang tajung ta taoba Northern Army commander Lieutenant General DS Hooda (retired)-i ashi.

January 12 nü senden amenba sülen India aser China nati külem sangdong ka ajanga, taoba mapang mulungtepbatem ka kuma yanglutsü aser security aser stability atema jenjang agitsü ta shiogo.

October 10 nü senden 13buba amenba sülen India Army-i, PLA-i parnoki benokba magizük aser China-ia India-i tamakoktsü takhangba agütsür, ta sangdonga liasü. Ajisiüaka January senden sülenbo tangatettep ka dangi arur ama osang sangdongogo.

January 12 nü senden ghonda 13 shi menaka Kongka La anasa Hot Springs nungi PLA ainshia oatsü atema India-i takok ngua sensak mesemtet aser iba den Daulat Beg Oldi sector nung Depsang aser Demchok kübok Charding Nullah Junction (CNJ) nung patrolling rights ken o benteta meytet.



New Delhi, Mar 8 : Mongolbarnü New Delhi nung Azadi Ka Amrit Mahotsav hopta amungba nung shilem ka ama Union Minister for Environment, Forest and Climate Change, Labour and Employment, Bhupender Yadav-i mapa inyakertem nem Shram awards agütsüba noksa nung angur. Minister of State for Petroleum and Natural Gas, Labour and Employment, Rameswar Teli aser Secretary, Ministry of Labour and Employment, Sunil Barthwal nata noksa nung angur.



Sydney, March 8, 2022 : Willoughby, New South Wales, Australia nung nüburtemi tzümetzung nokdangtsü atema jenjang agiba noksa nung angur. Tzümetsüng, mopung aser yipru ajanga Australia anütok tzükümlen maneni timtem agütsür. Iba tesem nung aliba nüburtem aika pei ki toktsür jenshiogo. Iba lendong nung Queensland nung nisung 13 aser New South Wales nung nisung tenet süogo.

Japan-i Russia nunger ketdangsürtem indang rongsen sota ayu

Tokyo, Metsüremi/March 8 (Agencies): Japan-i Russia aser Belarus nunger ketdangsürtem aser oligarch nisung aika indang rongsen sota yuogo. Moscow-i Ukraine amakba atema Tokyo-i iba temesenshi agütsüogo.

Tenokdangba ya Russia nunger 20 nem agütsüogo kong tir Vladimir Putin indang administration atema deputy chiefs of staff, Chechen Republic tekolakba aser Volga Group, Transneft aser Wagner amala Kremlin den sendaktepa aliba company tem indang executive tem densema lir, ta Japan indang finance ministry-i Mongolbarnü metetdaksüogo.

List nung züngoksema aliba item nisungtem aser teloktem

den sorkar nungi temelaba magi tang nungboi senotsü tsütatep mesütettsü, ta ministry-isa metetdaksü.

Japan-isa, Russia-i oil refinery equipment tem yoka aliba nokdangtsü aser Belarus dangi military-i amshitettsü akokba osettsütem yoka aliba sottsü, ta ministry-i ashi.

Maneni Japan-i, Belarusian defence ministry, armed forces, aser police organization aser Minsk nung amendaker aliba company, JSC Integral dangi osettsüt yokba aliba anentsü.

Anogo ishika tejakdang Japan-i, Russia indang central bank aser SWIFT international payments system mamshidaksütsü atema tenokdangba agütsüba amala

Russia dak rangloker tenokdangba aika agütsütsü sangdongba sülen tang ano iba jenjang ya agiogo.

Japan nunger gari yangluba company Toyota-ia parnoki indang garitem Russia-i meyoktsü telemtetba agiogo. Kasa mapang nung Japanese airlines-i Europe-i parnok indang tayimtsütem meyoker.

Iba tesem nung aliba tanga linük den medemdangra Japan-i Russia anema jenjang tesashiba agiogo. Kasa mapang nung iba tesem nung aliba sorkar timbai Russia anema mejembi mesüra tenokdangba magütsü. Japan dak alia South Korea, Singapore aser Taiwan-i dang Moscow anema jenjang agiogo.

Moderna aser Kenya na tenangzüktepba ka yanglu

Nairobi, Metsüremi/March 8 (Agencies): Pharmaceutical company tetsüti Moderna-i, Africa nung parnok indang mezüngbuba mRNA vaccine manufacturing facility ka amenoktsü asoshi Kenya sorkar den tenangzüktepba ka nung sign süogo.

Hombarnü company sangdong ka ajanga ashiba agi, parnok nükjidongji continent atema küm nung vaccine dose million 500 adokdaksütsü atema lir. Iba facility ya drug substance manufacturing dak

rangloker inyaktsü, ajisüaka fill-and-finish work dena bendenloktsü atema atsülangshitsü akok.

"Takhangba dak ajemdaker Moderna-i 2023 küm tashi nungbo Africa nung COVID-19 vaccine yanglutsü atema sentong yangludat," ta company-i ashi.

Tang alima nung Africa continent nung coronavirus vaccine tajemtiba agir lir aser nüburtem nem vaccine agütsütsü atema shilem 99 bo tanga linük nungi belener aruba

dak metaloker lir, ta World Health Organization-i ashi.

Takar linüktemi tarutsü atema vaccine telung junga bendena ayuba atema Africa nunger lenirtem tezü danga, continent-i vaccine yanglurtem tali anir arutsü atema bangjemogo.

October ita Senegal aser Rwanda-i, Africa nung mRNA vaccines yanglutsü atema mezüngbuba start-to-finish factories yanglutsü asoshi BioNTech den tenangzüktepba yangluogo.



Zhytomyr, Mar 8 : Russia-i Ukraine amak tenzükter anogo 13 buba nung Mongolbarnü Ukraine kübok Zhytomyr tesem nung oil depot ka nungi mi adokba temseptsü merangba noksa nung angur.

Poland-i Jets yoktsü lemetetra UK-i yaritsü

London, Metsüremi/March 8 (Agencies): British defence minister Ben Wallace-i Mongolbarnü ashiba agi, Poland-i Ukraine nem fighter jets agütsütsü atema telemtetba agira Britain-ia parnok nongita yaritsü, ajisüaka iba jenjang agiba ajanga Poland dak indang indanga kongshitsü akok ta tekümdangtsü metetdaksüogo.

"Parnoki kechi telemtetba agidir agiaka ni parnok nongita yaritsü," ta Wallace-i Sky News dang ashiba den Ukraine nungeri amshitettsüsa United Kingdom-i tayimtsü magütsütettsü.

"Onoki Poland kümzüka ayutsü; parnoki kechi nüngdaktir iba atema onoki teyari agütsütsü," ta pai ashi.

"Poland-i iba telemtetba agiba ajanga Ukraine nem indang indanga teyari agütsüba dang masü saka iba ajanga parnoka Russia mesüra Belarus amala linüktemi amak tenzüktsü akok ta Poland-i angateter

alitsü," ta Wallace-i ashi.

Britain-i Ukraine nem defensive weapon tem aser iba den tanga military aser humanitarian teyari agütsüogo.

Wallace-i ashiba agi, pai Bodhbarnü parliament nung osang ka agütsütsü. Britain-i maneni kechi koda lethal aser nonlethal teyaritem agütsütettsü iba indang asadangtsü aser koba lenla nung linüktem dang jenjang agitsü atema British sorkari mepeshitsü, iba indaggi sensak asemtsü.

Kasa mapang nung Canada-ia Russia nunger lenir den sendaktepa aliba lenir 10 nem tenokdangba tasen agütsüba sangdongogo, ta Canada Ato kilonser Justin Trudeau-i Hombarnü metetdaksü.

Item lenirtem indang tenüng ya Russia nunger tepuokdak yua aliba opposition lenir Alexei Navalny-i bendenba list nungi lir, ta Trudeau-i London nung osangbenertem den sensaksema mapang ashi.

Pak opposition-i PM Khan mapa nungi anentsü akhangter



Bilawal Bhutto

Islamabad, Metsüremi/March 8 (Agencies): Mongolbarnü Pakistan opposition party pusemer meyrejang aikati Ato Kilonser Imran Khan mapa nungi anentsü khangogo aser ajita mesüra parliament nung non-confidence vote ka agitsü renema alitsü shiogo. Pai rongsenketsüng shidak achayang masür aser srokar shidak len manir ta shia iba takhangba agütsüogo.

Pakistan People's Party (PPP) lenisüba nung opposition campaign tenzükogo aser parnoki linük yimden yimsüsüba nung mepetmesü adoktsü ta tsüba bilemba lemsatepogo, kong yimya agi linük yimsü asütsüpur ya military-i shimmer.

"Ghonda 24 tsüngda mapa tokjang aser election nung onok den toktepang," ta Bhutto'er jabaso aser PPP lenir Bilawal Bhutto-i linük yimtiba Islamabad nung longkak aitba sentong nung ashi.

"Mesüra no-confidence move ka atema renema liang," ta paisa ashi.

Khan-i aniba party-i election akokba sülen pa 2018 küm Ato Kilonser aküm. Ajisüaka military teyari agia pai election akok ta

pa aitsürtemi shia arudar.

Ajisüaka iba taittsüba ya Khan aser military napronglai magizük.

Opposition züngsemtem aser political analysts temi ashiba agi, PM ya military-i pu mesemi kümogo, saka Khan aser army napronglai iba ya aitsüogo.

Opposition lenirtemi ashiba agi, inflation aika akümba, sentsüh tali akümba aser foreign reserves jenjang mejungi akümba ajanga pa timtem nung aliba mapang nüburtemi pa pu mesemi kümogo.

Khan-i item taittsübatem magizük aser rongsenketzung nung tebilemtsü aliba dak sendakba nung telangzüba agüja totzü, electricity nung jenjang ajemtsüogo aser pa mapa nungi anentsü akhangba magizük.

Opposition aser Khan party naprongla yongtsü nung mangettep adoker lir, ajisüaka opposition-i ashiba agi, no-confidence vote ka atema parnoki parliament züngsem 11 dang temulung meyipdaksütsü nüngdaker.

Taoba küm Khan-i vote trok agi no-confidence vote kokogo. Pakistan nung taruba general election 2023 küm agitsü.

TEPELA LEMSATEPER



TASOBA ANOGO:
11.09.1956

TASÜBA ANOGO:
02.03.2022

Onoki teti meima aliba asür **Wt. Ngangshisongla** W/o C. Meya Imchen (Moayimti), shirangba mapang nungi tenzüker la iba akümüli tembangba anogo tashi nung kinunger, adianu, kiyonger, yimer-yimsanger, kija, kibong aser lokti tentet balala ana aser talang nungi kwinakati sarasadem, nübu, rongsen aser shisatsü agi yariogo, kanga dang pelar. Tsüngremi nenok ajak talubosa moajang ta ozü sarasadem.

Temeim kinungbo, chirnur, semchir, anükapang aser kinungertem

Mulungnen O

18th Aug. 1981 - 26th Feb. 2022

Pungmang ama mamangtetsüka, onoki teti meima aliba Asür **Tiatemshi (Longsa)** mapang tatsüka shirang yipden nung alidang aser pa asünü tashi ana aser talang nungi shirisa sarasadem, nubu aser rongsen agi yaria aruogo ajak dang iba osang ajanga kanga pelaba lemsateper.



Nenok temeim aser mapa tajung onoki teti bilemtetsü. Tsüngremi nenok maneni moajangma.

Temeim kinungsü, chirnur aser kinungertem.



OFFICE OF THE
KOHIMA LONGSA SENSO TELONGJEM
KOHIMA - 797001, NAGALAND

KONANG TETUSHI AGÜTSÜR

Kohima Longsa Senso Telongjem ajanga asen lenir **Wb. Rongsennungba**, S/o Lt. Masalepden, Govt. of Nagaland, Department of Fisheries and Aquatic Resources nung tematiba Director menden tongtetba asoshi KLST ajanga asen lenir nem konang tetushi aser aküm agütsür.

Sokar tenzüka wadang nung mangdang tulu yur alima aser nübur lenitsü asoshi teyanglur Tsüngremi asen lenir taküm aser kibong arishi moajang ta sarasademtsür.

Sd/-
Limaonen
President, KLST

Sd/-
Imlisunep Pongen
General Secretary, KLST

(Rtd) Project Director, K Inavi Chishi den tepila sentong agiogo



Zunheboto, Metsüremi/ March 08, 2022 (TYO): Hombarnü (07.03.2022) DRDA Rest House, Zunheboto nung DRDA Zunheboto-i mapa nungi anisüngzüker (Rtd) Project Director, K Inavi Chishi den tepila sentong agia liasü, ta sangdong ka ajanga metetdaksü.

Iba sentong nung Deputy Commissioner Zunheboto, Peter Lichamo (IAS)-i ashiba agi, sorkar tenzüka wadang nung inyaka aser temang shi

nung anema lia mapa nungi anisüngzüka ya sempet tulutiba rongnung ka asütsü, koba teinyaker kati pei nem lemsütsüba mapa nung bendanga agüja inyaker sülen iba sempet ya agitsü akok.

Mapa nungi anisüngzüksang Chishi-i sorkar tenzüka wadang nung alidang pai bendanga agütsür inyaksü mechi khuret bena aser nungitta yariba atema DC-isa Chishi'er kibong züngsem danga pelaba lemsatep.

Iba sentong nung APO cum DPO, Kuhucuyi D.Vadeo menden liasü. Jimokali K. Rotokha-i ken ka aten.

Engineering wing, NRLM, VDB association, MGNREGA aser DRDA tenüng nung nisung balalai o jembiogo.

(Rtd) Project Director, K Inavi Chishi-i, temoatsü angutsü mechi pei nem lemsütsüba mapa ochishia aser bendanga agütsür inyaksü asoshi department ajungshia liasü, ta kasa sangdong ajanga ashi.

Kiphire nung 'Mock Exercise' agiogo

Kiphire, Metsüremi/March 08, 2022 (TYO): Mongolbar anepdang 11:00 meta Zisaji Presidency Government College Kiphire nung menoknok dak sendakba nung Mock Exercise agiogo. Iba mapang Richter Scale - magnitude 8.7 menoknok anokba yimyatem asadanga, teraksa adokdaksüba aser teinyaksütem sayua liasü, ta sangdong ka ajanga metetdaksü.

Iba Mock Exercise nung SDRF rescue team-i menoknok anokba mapang nisung koma kümzüksü indang tesayuba agütsü.

Jilushi ajanga item tesayuba agüja liasü, kong menoknok anokba osang angashia, Government of Nagaland, District Operation Team (SDRF)-i menoknok anokba tesem jagi aritepa ao aser

nisungtem kümzüksü asoshi tensa asadanga liasü.

Iba mapang SDRF rescue Team-i menoknok anokba tesem nungi tasü mang 2 agitet aser iba lendong nung nisung asem kanga mejungi yiruba den nisung pezü terara yiru aser nisung ka kanga mejungi mi agi ronger aliba kumzüka sayu. Yirur alirtem nem 'first aid' agütsü aser mozüki anir oa sayua liasü.

Iba demonstration mapang, SDRF team-i top floor' nung lendong nung alir tanur ka lisü amshia kümzüka/anir aluba jilushi ka sayu, ta kasa sangdong ajanga ashi.

Maneni, sangdong tanga ka ajanga angazükba agi, Government of Nagaland, Home Department ajanga renemba ama, Hombarnü (07.03.2022) Deputy

Commissioner, Conference Hall, Kiphire kübok menoknok nung Tabletop Exercise agia liasü.

Iba sentong nung DC Kiphire, Wati Aier-i ashiba agi, Nagaland aser Northeast region ajunga 'high seismic zone' ka nung lir aser item tesem nung menoknok kanga sashia anoktsü lendongbang nung lir.

Mapang shia Nagaland tesem balala nung menoknok anokba nüburtemi ajangshidar aser tarutsü anogotem nung Dimapur nung menoknok tulu adoktsü akok, ta Wati-i bilemba lemsatep.

Item mock exercise ajanga menoknok anokba mapang teraksa adokdaksüba ajemdaksütsü mechi angazükba den renema alitsü asoshi pai külem sendaktepa alirtem ajungshia liasü.

EE Electrical Division, Peren ajanga metetdaksür

Peren, Metsüremi/March 08, 2022 (TYO): Executive Engineer (EE) Electrical Division, Peren, Er. Tsiamchi Nidang-i sangdong ka nung, New Peren Village aser Old-Chalkot Village ajanga DC Complex Peren nungi Ahthibung Town tashi 33KV Transmission line yangluba maparen tembangogo, ta metetdaksü.

Iba transmission line ya 'test charged' asütsü aser March 10, 2022 nungi tenzüka charging asütsü. Anungji, iba maparen dak sendakba nung, nübur dang kümdanga alitsü aser charged transmission line temeküt anasa mesenzütsüla, ta kasa sangdong ajanga ashi.

Angami Students' Union ajanga metetdaksür

Kohima, Metsüremi/March 08, 2022 (TYO): Kümsük 2021-23 atema Angami Student's Union indang 1st Union Assembly ya March 17, 2022 nü Indoor Stadium, D'Khel, Kohima Village nung agitsü renema lir, ta sangdong ka nung Viranu Ltu, Speaker ASU Union Assembly aser Kekhrievotso Medoze, Assembly Secretary

ajanga Angami Students' Union kübok tentet aser unit ajak dang metetdaksür.

Iba Assembly ya anepdang 11:00 shitak nungi tenzüksü. Anungji, Angami Student's Union den sendaktepa alir tentet aser unit ajak medema aruagi 1st Union Assembly nung adentsü asoshi mepishir, ta kasa sangdong ajanga ashi.



"International Women's Day" amungba tenüng nung March 8 nü district administration den külem sür Sakhi One Stop Centre Mokokchung-i Dr. Imkongliba Memorial District Hospital (IMDH) semdanga yangji amunger tetsür ajak nem temang nung teyari agütsüba chiyungtsü kar alemdang tangokba noksa nung angur. Mokokchung, 8th March, 2022

Sports Leadership School nung NE state 6 agi shilem agitsü



Kohima, Metsüremi/March 08, 2022 (TYO): GETHEMGO Sports International and Sports Coalition of India den longjemer anogo 10 tashi ayonga agitsü renemba Sports Leadership School ya Hombarnü (07.03.2022) KABA Jubilee Memorial Centre, Lerie, Kohima nung tenzükogo. Iba sentong ya "Building Church Sports Leaders" omen nung ajemdaker agitsü, ta sangdong ka ajanga metetdaksü.

Sports Leadership School sentong atema North East kübok state trok - Assam, Arunachal Pradesh, Manipur, Meghalaya, Nagaland aser

Tripura nungi Arogo lennirtem, Missionary tem aser saisapong wadang balala nungi asayatem Kohima nung adenshia lir.

Iba sentong lapokba sentong nung, Project Director of Task Force for Music and Arts (TaFMA) Nagaland, Dr Hovithal Sothu-i, lennirtem dang anibelem arema inyaksü ajungshia liasü.

Pai ashiba agi, lennir tajung ka akümsü asoshi nükla tejangja alitsüla. Telok tsünga tangatetep nung inyaksü aser züngsemtem ajungmesotsü atema telongjem alitsü nüngdaker.

Timtem mesüra tenokdangba balala liaka, pei dak temulungtetba tulu yur inyaksüla, ta pai ajungshi.

Church Sports and Recreational Ministries, America nungi Jonathan Detweiler aser GSI Director Dr Viposa Kiso napronglai iba sentong nung jembio.

Iba sentong nung Peraciezie Baptist Church Kohima, Pastor, Dr Kevichalie Metha menden liasü. GethemGo Sports Society, Chairman Hoshika Swu-i telok pela agizükba o jembi.

Iba training mapang, servat leadership, Laishiba azünga, Sarasdamba, Asayaba, Jembiba aser Saisapong asayamung yimyatem nung session balala agitsü. Iba sentong ya March 16, 2022 nü tembangtsü, ta kasa sangdong ajanga ashi.

42buba Kohima Law College annual sports meet tenzükogo



Kohima Law College indang 42buba Annual Sports Meet 2022 lapokba sentong nung Asst. Professor Kezhokhoto Savi den tanga Asst. Professor aser law azünger kaketshir tem külemi tangokba noksa nung angur.

Kohima, Metsüremi/March 08, 2022 (TYO): Mongolbar anepdang 9:00 meta Kohima College/T.M. Govt Higher Secondary School indang play ground nung 42buba Kohima Law College Annual Sports Meet 2022 lapokba sentong den repsema 'International Women's Day' benjungmung agiogo. Iba sentong nung Asst. Professor Kezhokhoto Savi dena liasü, ta sangdong ka ajanga metetdaksü.

Savi-i, alima ajunga asünga coronavirus wara tenokdangba ajanga taoba academic session nung college-i annual sports meet masayatet aser saisapong ajanga tangatetba tajung adokdaksür aser yimjung lidaksür ta tamangba yur iba

sports meet ayongzüktsü mapang agi sempettsüba yong asenoki Tulusang Tsüngrem nem tenüngsang agütsüdi, ta ashi.

Tanü (08.03.2022) ya 'International Women's Day' anogomung lir aser saisapong 150 (tetsür aser tebur) nungi tetsür timba, koba ajanga iba anogomung tali meraktdaksür, ta pai ashi.

Tetsürtemi jenjang balala nung ajangzüktdattem bilemtetta tanü asenoki benjungteper aser taküm iba anogomung indang omen - "BreakTheBias" nung ajemdaker asenoki tetsür aser tebur 'bendanga' amshiba nung tekümdangtsü osang sangoktsüdi, ta pai telok ayongzük.

Kohima Smart City

Development Limited indang Senior Legal Consultant ama Savi-i, Kohima nung alir senso talisa ali kiburtem dang Kohima Smart City Development project balala nung amalitepa inyaksü ajungshia liasü.

Maneni, kasa sentong nung KLCEU President-i sarasadem aser Kohima Law College Students' Union (KLCSU) indang President-i tir o jembi. Nocklei M aser Yongyo nati ken ka tena liasü.

Sports Secretary KLCSU ajanga iba meet nung shilem agirtem tenangzüktep agiba ketdangtsü liasü. Iba sülen 42buba Sports Meet ya Asst. Professor Kezhokhoto Savi-i tenzükja liasü. Savi ya Students' Welfare, Kohima Law College indang Teacher-in-Charge lir, ta kasa sangdong ajanga ashi.

ICC Women's ODI Rankings: Mithali Raj jenjang pezübubai luogo

Dubai, Metsüremi/March 08, 2022 (Agencies): One Day International batter atema tesüsa sangdongba ICC Women's rankings nung, Australia tetsür team captain Meg Lanning jenjang tanabubai tuogo. Kasa rankings nung India team captain Mithali Raj jenjang pezübubai luogo.

Tang asaya aliba ICC Women's Cricket World Cup 2022 indang mezüng match pungo ajanga ICC Women's ODI Player Rankings tasen nung temelenshi tulu adokdaksü.

ICC Women's Cricket World Cup asayamung mezüng match nung Lanning-i junga asaya liasü. Mezüng match nung Australia aser England na asayaba mapang Lanning-i ball 110 nung 4s 7 aser 6s 1 densema run 86 yanglua liasü aser ibaji ajanga Australia-i run 310 yanglutet.

Iba asaya (Australia vs England) indang 'Player of the Match' award angur Rachael Haynes, shibai ball 131 nung run 130 yanglutet, rankings nung lai top 10 nung jenjang 7buba tongtetogo. Kasa match nungi century yanglur England tsür Nat Sciver jenjang pungo tashi alema jenjang trokbubai tuogo.

Batter, bowler den külemi all-rounder atema iba ranking

nung West Indies tsür Hayley Matthews-i jenjang tulu ajangzüktdetta lir.

Iba World Cup nung West Indies-i New Zealand madak run 3 agi takok anguba match nung Hayley-i Player of the Match' award angu. Iba match nung West Indies-i New Zealand nem target - run 260 yutsütsü mechi Hayley-i century (119) yanglua liasü. Batting dak alaka, Hayley-i Amelia Kerr aser Brooke Halliday na indang wicket agi.

All-rounder list nung Hayley Matthews-i jenjang trok tashi alema top 5 tongtdetta No. 4-i tuogo aser batter list nung jenjang 12 tashi tua No. 20 aser bowler list nung jenjang 3 tashi tua No. 10 tongtetogo.

Tesüsa sangdongba ICC Women's ODI rankings nung jenjang temabai atur asayar rongnung South Africa tsür Ayabonga Khaka dena lir. Bangladesh aser South Africa tsünga match nung Khaka-i junga asayaba asadangtdetta la No.6 tongtetogo.

Iba den bendenloksema, India tsür Sneha Rana aser Pooja Vastrakar, shirnoki run 122 bendenlokja liasü (India aser Pakistan), tenaprongla batter indang rankings nung jenjang temabai tuogo.

Bhandari nung 4buba Inter-departmental sports meet tenzükogo



Bhandari, Metsüremi/March 08, 2022 (TYO): Beti Bachao Beti Padhao mapatong pusema Local Ground, Bhandari nung Mongolbarnü 4buba Bhandari Inter-departmental sports meet 2022 tenzükogo. Iba Meet lapokba sentong nung alakteta tejaoker ama Additional Deputy Commissioner Bhandari, Rohit Singh IAS dena liasü, ta sangdong ka ajanga metetdaksü.

Tetsür anema mapa tamajung inyakba aser parnok bendanga amshiba dak sendakba nung tekümdangtsü osang sangoktsütsü nükjidong nung Beti Bachao Beti Padhao akhüm nung iba Sports Meet ayongzüktsü asoshi iba sub-division indang sorkar tenzükba wadang nung inyaktertemi maneni meranga inyakba ngua ADC-i pelaba lemsatep; aser lenla ajunga nung tetsürtem

maparen nungitta yaritsü mepishia liasü.

Iba ama saisapong sabang agütsüba ajanga pei sempet tali jangiatettsü asoshi maangka agütsür aser nükjidong ka ataloktsü asoshi telongjem lidaksür, ta pai ashi.

Iba sentong nung Lily Ngullie, APRO Bhandari menden liasü aser SDAO Office Baghty, Senkathung Kikon-i ken ka tena telok saksalemdaksü.

4buba Inter-departmental sports meet tenzükba football match asaya liasü, kong PWD (R&B) (EE Baghty), Housing, and PHED team-i goal 2-0 agi Education department tsükdaksü. Tanabuba match nung District Administration & Police-i goal 7-0 agi Medical, GHSS, and Soil & Water Conservation department team tsükdakja liasü.

BILEMDANGANG

"Tim mesüi shimtetba lenniri tim lenmang nung mejajar."